

Pitanja i odgovori iz prve sedmice (02-08. februar 2026) objave Poziva za dostavljanje projektnih prijedloga u okviru EU4CAET – Instrumenta za dodjelu grantova – Finansijski aspekt - Poziv br. 1 (EU4CAET Poziv)

Pitanje 1.

Molim Vas za informaciju da li se i privatni subjekti mogu prijaviti za sredstva za dodjelu granta po pozivu?

Odgovor 1.

U skladu s EU4CAET Pozivom, prihvatljivi podnosioci projektnih prijedloga su općine i gradovi u Bosni i Hercegovini, kao i partnerstva koja uključuju općine/gradove i druge subjekte, kao što su zajednice obnovljive energije (osnovane ili u procesu osnivanja), subjekti privatnog sektora i/ili građani, osnovane u Bosni i Hercegovini. Privatni subjekti se, dakle, mogu uključiti kao dio partnerstva s općinom ili gradom, ali ne mogu samostalno nastupati kao podnosioci projektnih prijedloga.

Pitanje 2.

Kontaktiram Vas vezano za objavljeni poziv EU4CAET. Iako sam detaljno pročitala u vodiču ko su aplikanti, molim Vas za informaciju da li Univerzitet kao pravno lice može da bude koordinator projekta ili kao druga opcija da bude u partnerstvu sa gradskom upravom, ali da se implementacija projekta (infrastrukturni radovi) izvode na univerzitetu?

Odgovor 2.

U skladu s EU4CAET Pozivom, univerzitet kao pravno lice ne može samostalno biti vlasnik projekta. Međutim, univerzitet može učestvovati kao partner u okviru prihvatljivog partnerstva koje uključuje općinu ili grad. U tom slučaju, implementacija projekta može se realizirati na objektima univerziteta, pod uslovom da su ispunjeni svi zahtjevi EU4CAET Poziva, uključujući jasno definisane uloge partnera, vlasništvo ili pravo korištenja objekta, te usklađenost projekta s ciljevima i prihvatljivim tehnologijama EU4CAET Poziva.

Pitanje 3.

U vezi sa vašim pozivom imamo pitanje publike. Naime mi smo u procesu implementacije projekta u sklopu kojeg trebamo registrovati prvu civilnu EZ ili ZOIE u Bosni i Hercegovini. Projekat finansira EU kroz mrežu i međunarodnu razvojnu agenciju. Sam projekat traje sada



od februara 26 do februara 27 godine. Nas zanima imamo li recimo pravo da apliciramo kod vas na poziv naravno ne za istu svrhu i namjenu. Jer ovamo uspostavljamo neku vrstu baze.

Odgovor 3.

U okviru EU4CAET Poziva, pravo na podnošenje projektnih prijedloga imaju općine i gradovi u Bosni i Hercegovini, kao i partnerstva koja uključuju općine/gradove, uključujući zajednice obnovljive energije (osnovane ili u procesu osnivanja), subjekte privatnog sektora i/ili građane, osnovane u Bosni i Hercegovini. Postojanje ili implementacija drugih projekata, uključujući projekte finansirane iz EU izvora, nije kriterij za isključenje, pod uslovom da se projektni prijedlog na EU4CAET Poziv odnosi na prihvatljivog vlasnika projekta i na projekat koji je u skladu s ciljevima i uslovima EU4CAET Poziva. Međutim, svi dodatni izvori finansiranja moraju biti u potpunosti objavljeni u obrascu projektnog prijedloga, u skladu sa zahtjevima transparentnosti definisanim EU4CAET Pozivom. Nadalje, općina ili grad, kao vlasnik projekta ili vodeći partner, snosi punu odgovornost za implementaciju projekta, uključujući usklađenost sa važećim propisima o javnim nabavkama i svim drugim obavezama definisanim EU4CAET Pozivom i pripadajućim ugovornim okvirom.

Pitanje 4.

Ugradio sam u oktobru 2025. godine solarni sistem napajanja strujom. Trenutno sam u fazi da budem Prosumer. Zanima me mogu li na osnovu ovoga prijaviti se na natječaj i dobiti neka finansijska sredstva za refundaciju troškova.

Odgovor 4.

U okviru EU4CAET Poziva nije moguće podnijeti projektni prijedlog za refundaciju već nastalih troškova, niti za projekte koji su već implementirani prije podnošenja projektnih prijedloga. Također, fizička lica (pojedinci/prosumeri) ne mogu samostalno biti podnosioci projektnih prijedloga u okviru EU4CAET Poziva.

Pitanje 5.

U samom pozivu na nekoliko mjesta se pominje uslov uključenosti zajednica u projektu. Obzirom da do sada nema objavljenih konkretnih registrovanih zajednica obnovljive energije u Bosni i Hercegovini, već se radi još uvijek pravnom okviru koji je uspostavljen ili se finalizira, uključujući registre koje tek treba pokrenuti, te ZOE kao tijela u našoj zemlji još uvijek nisu registrovana kao takva, postoji li mogućnost revidiranja/prilagodbje uslova dato situaciji. Ispod isječak iz poziva kao primjer traženog: „Osim fotonaponskih projekata, koji moraju biti implementirani kroz ZOE, sve ostale prihvatljive tehnologije mogu se podnijeti



kao projekti vođeni zajednicom, koje implementiraju općine ili gradovi uz aktivno učešće građana, lokalnih zajednica ili partnerskih organizacija, bez obaveze uspostavljanja ZOE.“

Odgovor 5.

EU4CAET Poziv već u svojoj strukturi uzima u obzir trenutni regulatorni kontekst u Bosni i Hercegovini, uključujući činjenicu da su zajednice obnovljive energije (ZOE) u ranoj fazi uspostavljanja. Iz tog razloga, EU4CAET Poziv omogućava podnošenje projektnih prijedloga kroz ZOE koje su osnovane ili u procesu osnivanja, kao i alternativno kroz projekte vođene zajednicom koje implementiraju općine ili gradovi, uz aktivno učešće građana ili partnerskih organizacija, za sve prihvatljive tehnologije osim fotonaponskih sistema.

Pitanje 6.

Poslijemo u pravnom obliku poljoprivredne zadruge, koja okuplja mlade poljoprivrednike iz ruralno nerazvijenih krajeva sjeverno-zapadne Bosne i Hercegovine. Zadruga se bavi proizvodnjom povrća i uvođenjem tehnoloških inovacija u primarnu proizvodnju u korist zaštite zemljišta od zagađenja, manji utrošak vode, bez upotrebe pesticida. U okviru objavljenog poziva vidimo potrebu za toplotnom pumpom kako bi dvanaest mjeseci obezbjedili iste uslove unutar plastenika i temperature vode u bazenima kako bi ostvarili maksimalnu proizvodnju. Da li mi imamo pravo aplikacije na projekat?

Odgovor 6.

Poljoprivredna zadruga, kao pravno lice, ne može samostalno podnijeti projektni prijedlog u okviru EU4CAET Poziva. Pravo na podnošenje projektnih prijedloga imaju općine i gradovi, kao i zajednice obnovljive energije (osnovane ili u procesu osnivanja), te partnerstva koja uključuju općinu/grad. Međutim, poljoprivredna zadruga može učestvovati kao partner u okviru prihvatljivog partnerstva s općinom ili gradom. U tom slučaju, projekat može biti prihvatljiv, pod uslovom da projekat ispunjava sve uslove EU4CAET Poziva.

Pitanje 7.

Opština je upoznata sa Javnim pozivom EU4CAET koji ste objavili i izražava zainteresovanost za učešće u istom. U okviru planiranih aktivnosti u projektu predviđena je zamjena postojeće javne rasvjete na teritoriji opštine savremenom LED rasvjetom, sa ciljem unapređenja EE, smanjenja potrošnje električne energije i ostvarivanja dugoročnih finansijskih ušteda. Kao osnovnu tehničku-projektnu dokumentaciju posjedujemo izrađenu Studiju izvodljivosti koju je izradio konzorcijum sastavljen od relevantnih firmi uz finansiranje međunarodnih partnera. Ista obuhvata planirane aktivnosti. S obzirom na to da se radi o



zamjeni već postojećih svjetiljki, molimo Vas za pojašnjenje da li je pored navedene Studije neophodno pribaviti dodatne saglasnosti, dozvole ili odobrenja te ukoliko jeste koje konkretno?

Da li je iznos granta u okviru projekta iskazan sa PDV-om ili bez PDV-a?

Odgovor 7.

U skladu sa članom 6.3 EU4CAET Poziva – Obavezna projektna dokumentacija, tačka E. Dozvole i saglasnosti, aplikanti su dužni dostaviti sve dozvole i saglasnosti potrebne za predloženu tehnologiju i lokaciju projekta, izrađene i izdate u skladu s važećim zakonodavstvom Bosne i Hercegovine te relevantnim entitetskim i/ili kantonalnim propisima. Okvirna lista potrebnih dozvola i saglasnosti navedena je u Obrascu projektnog prijedloga, Poglavlje 8 – Dozvole i saglasnosti za FN sisteme, EV punjače i javnu rasvjetu. Međutim, navedena lista služi isključivo kao orijentacioni pregled i ne oslobađa aplikante obaveze da dostave svu dokumentaciju koja može biti zahtijevana važećim zakonodavstvom za konkretan projekat. Pored toga, projekat treba biti spreman za izgradnju odnosno implementaciju, kako sa aspekta pribavljenih dozvola i saglasnosti, tako i u pogledu nivoa i stepena razrađenosti projektna dokumentacije (npr. glavni projekat u skladu s relevantnim propisima). Projekti koji imaju kompletiranu potrebnu dokumentaciju i ispunjene uslove za neposredan početak realizacije nakon odobrenja finansiranja biće ocijenjeni većim brojem bodova. Projekti nižeg stepena pripremljenosti, sa nepotpunim dozvolama ili nedovoljno razrađenom projektnom dokumentacijom, biće bodovani proporcionalno niže u skladu s kriterijima ocjene.

U pogledu finansijskog aspekta, iznos granta se odobrava bez PDV-a, u skladu sa Članom 6. Ugovora za korisnike bespovratnih sredstava u okviru EU4CAET Instrumenta za dodjelu grantova. S druge strane, u okviru vlastitog učešća koje vlasnik projekta mora prikazati, PDV mora biti uračunat i prikazan kao dio ukupne vrijednosti vlastitog doprinosa projektu.

Pitanje 8.

Javljam Vam se ispred kompanije iz Zvornika. Zainteresovani smo za prijavu na Poziv br. 1– EU4CAET-Instrument za dodjelu grantova. Mi planiramo u narednom periodu realizaciju projekta solarnih fotonaponskih sistema. Stoga bi htjeli da nam malo približite šta znači da se mogu prijaviti isključivo kao projekti razvijeni i implementirani kroz strukturu Zajednice obnovljive energije (ZOE), kako bi znali da li možemo aplicirati za ova sredstva?

Odgovor 8.

U skladu s važećim zakonodavstvom Republike Srpske, Zajednica obnovljive energije (ZOE) je definisana Zakonom o obnovljivim izvorima energije Republike Srpske („Službeni



glasnik Republike Srpske“, br. 15/22 od 03.03.2022) kao pravno lice osnovano u skladu sa propisima, s ciljem korištenja obnovljivih izvora energije za proizvodnju električne energije prvenstveno radi zadovoljenja energetske potreba svojih članova, uz ostvarivanje ekoloških, ekonomskih i socijalnih koristi za članove zajednice i društvo u cjelini. Dodatno, oblast zajednica obnovljive energije detaljnije je uređena kroz Pravilnik o zajednicama obnovljive energije, koji je donijela Regulatorna komisija za energetiku Republike Srpske (RERS), a kojim se definišu uslovi osnivanja, organizacije, prava i obaveze ZOE, kao i njihov odnos prema energetskom sistemu.

U tom kontekstu, u okviru EU4CAET Poziva, projekti solarnih fotonaponskih sistema mogu se prijaviti isključivo kao projekti razvijeni i implementirani kroz strukturu Zajednice obnovljive energije, koja može biti već pravno osnovana ili u procesu osnivanja, u skladu s važećim propisima. U slučaju kada je aplikant Zajednica obnovljive energije, najmanje jedan osnivački član mora biti općina ili grad. Privredni subjekti, uključujući vašu kompaniju, mogu učestvovati isključivo kao partneri u okviru takve strukture, pod uslovom da projekat ima jasno definiran zajednički karakter, koristi za lokalnu zajednicu i da ispunjava sve ostale uslove EU4CAET Poziva.

Pitanje 9.

Da li može podnijeti zahtjev za pomoć udruženje za izbjegla i raseljena lica za implementaciju projekta solarna energija - nabavka panela.

Odgovor 9.

Udruženje za izbjegla i raseljena lica kao pravno lice ne može samostalno podnijeti projektni prijedlog u okviru EU4CAET Poziva. U skladu s EU4CAET Pozivom, projekti solarnih fotonaponskih sistema mogu se prijaviti isključivo kao projekti razvijeni i implementirani kroz strukturu Zajednice obnovljive energije (ZOE), koja može biti osnovana ili u procesu osnivanja, u skladu s važećim propisima. U slučaju kada je aplikant Zajednica obnovljive energije, najmanje jedan osnivački član mora biti općina ili grad. Udruženje za izbjegla i raseljena lica može učestvovati isključivo kao partner u okviru prihvatljive strukture, pod uslovom da projekat ima jasno definiran zajednički karakter, koristi za lokalnu zajednicu i ispunjava sve ostale uslove EU4CAET Poziva.

Pitanje 10.

Obraćamo vam se kako bismo izrazili interes za Poziv br. 1 – Finansijski prozor i zatražili pojašnjenje u vezi s prihvatljivošću našeg projekta održivog hotela. Naša kompanija nalazi se u završnoj fazi izgradnje boutique hotela sa 28 soba na prepoznatljivoj lokaciji. Projekat



je dizajnirao višestruko nagrađivani arhitekt, a zamišljen je kao regionalni primjer dobre prakse u oblasti održivog turizma i ugostiteljstva. U pogledu naše strategije energetske tranzicije, želimo istaći sljedeće:

- Sistem toplotnih pumpi: Već smo nabavili visokoučinkovite toplotne pumpe (trenutno su uskladištene i čekaju ugradnju). Planiramo njihovu integraciju u sveobuhvatan, klimatski neutralan sistem grijanja i hlađenja.
- Buduće „zelene“ faze: Pored toplotnih pumpi, naša razvojna mapa uključuje i dodatne „zelene“ investicije, poput pametnih sistema upravljanja energijom (BMS), integracije solarne energije i naprednih tehnologija za očuvanje i racionalno korištenje vode.
- Status projekta: S obzirom na to da fizička ugradnja energetskih sistema, kao i završna „zelena“ faza hotela, tek predstoje, interesuje nas da li su ove naredne faze i pripadajući troškovi opreme prihvatljivi za finansijsku podršku u okviru Poziva br. 1.

Da li privatni MSP projekat ovakvog arhitektonskog i ekološkog značaja, koji direktno doprinosi dekarbonizaciji jedne od najznačajnijih turističkih lokacija, može biti razmatran u okviru ovog instrumenta?

Spremni smo dostaviti svu tehničku dokumentaciju i glavni arhitektonski plan kako bismo dokazali usklađenost projekta s ciljevima EU4CAET inicijative.

Odgovor 10.

U okviru EU4CAET Poziva, privatni MSP projekat ne može se smatrati prihvatljivim kao samostalan projektni prijedlog, bez obzira na njegov arhitektonski kvalitet, ambiciju u pogledu zaštite okoliša ili usklađenost s principima održivosti. U skladu s EU4CAET Pozivom, prihvatljivi vlasnici projekata su općine i gradovi, Zajednice obnovljive energije (osnovane ili u procesu osnivanja), kao i partnerstva koja uključuju općinu ili grad. Privatne kompanije i MSP-ovi ne mogu samostalno podnijeti projektne prijedloge u okviru ovog Poziva. Privatna kompanija može učestvovati isključivo kao partner u okviru prihvatljive strukture (npr. partnerstva koje predvodi općina/grad ili Zajednica obnovljive energije), pod uslovom da projekat ima jasno definiran zajednički karakter, donosi konkretne koristi za lokalnu zajednicu i u potpunosti ispunjava sve uslove EU4CAET Poziva.

Pitanje 11.

Da li se obični građani mogu prijaviti na ovaj Poziv? Trenutno sam u procesu izgradnje fotonaponske solarne elektrane snage 10 kW na porodičnoj kući, koju finansiram vlastitim sredstvima, pa me zanima da li se mogu prijaviti na ovaj konkurs?



Odgovor 11.

Fizička lica (pojedinci/građani) ne mogu samostalno podnijeti projektni prijedlog u okviru EU4CAET Poziva. U skladu s EU4CAET Pozivom, projekti solarnih fotonaponskih sistema mogu se prijaviti isključivo kao projekti razvijeni i implementirani kroz strukturu Zajednice obnovljive energije, koja može biti osnovana ili u procesu osnivanja, te u kojoj učestvuju više članova s jasno definisanim zajedničkim ciljevima i koristima za lokalnu zajednicu. Građani mogu učestvovati isključivo kao članovi ili partneri u okviru Zajednice obnovljive energije ili u projektima koje predvodi općina ili grad, pod uslovom da su ispunjeni svi uslovi EU4CAET Poziva.

Pitanje 12.

Da li mogu aplicirati kao fizičko lice stanovnik BiH za toplotnu pumpu za grijanje porodične kuće, grad Tuzla i šta mi je potrebno od dokumentacije?

Odgovor 12.

Fizička lica (pojedinci/građani) ne mogu samostalno aplicirati za finansijsku podršku u okviru EU4CAET Poziva, uključujući projekte ugradnje toplotnih pumpi za grijanje porodičnih kuća. U skladu s EU4CAET Pozivom, prihvatljivi vlasnici projekata su općine i gradovi, Zajednice obnovljive energije (osnovane ili u procesu osnivanja), kao i partnerstva koja uključuju općinu ili grad. Projekti namijenjeni isključivo individualnim domaćinstvima nisu prihvatljivi kao samostalni projektni prijedlozi. Građani mogu učestvovati isključivo kao članovi ili partneri u okviru projekata koje predvodi općina ili grad, pod uslovom da projekat ima jasno definiran zajednički karakter i ispunjava sve ostale uslove EU4CAET Poziva.

